

續行水金鑑卷第五十九

淮水 章續八

乾隆五十一年正月奉

上諭清口東西壩朕從前南巡親臨閱視所定水誌原爲平時湖水滿足而設至蓄洩機宜理應隨時通變視湖水長落尺寸以定拆收分數如遇湖水盛漲則亟應拆展以資宣洩湖水消落則口門收束一丈湖水卽得一丈之益操縱在人節宣有制最爲良法前年九月以後湖水日漸消落薩載李奉翰卽應將清口兩壩酌量倍加收束預爲蓄水地步乃意存惜費且不攔截收蓄致清水益弱黃水倒灌停沙梗阻運道竟成淤淺不得

續行水金鑑卷五十九

淮水 一

已將湖水築壩閉住借黃濟運乃係一時權宜可一不可再之舉此皆薩載李奉翰因循貽悞屢降諭旨甚明今清口東西壩旣經酌量移建並將口門按照高堰誌椿酌定收束尺寸現在淇湖清水已據該督等具奏蓄至四尺二寸日來是否續有增長所蓄清水較黃水高有若干重運經臨啟壩放水時能否足以衝刷淤沙敵黃濟運著傳諭薩載等卽將現在情形據實詳悉覆奏至將來湖水長落該督等務須隨時察看一遇清水漸消卽應將口門收窄以資瀦蓄毋再惜費貽悞

河渠紀聞

三月二十六日李奉翰奏淇湖水自二月二十六日

啟放攔湖壩後一出清口會黃歸海一入裏河運道

歸江兩路分流順利核計放壩以來已經匝月湖水無長無消高堰誌椿仍存水四尺六寸較上年此時清水已大數尺臣意謂可以敵黃且淮揚運河於開壩啟放清水後兩邊浮沙日刷河面河底較寬已屬極好機會乃三月十五以後黃河桃汛水發連日加長徐城誌椿長至六尺八寸外河老壩口誌椿連底水長至一丈五尺四寸清口新建東西二壩原留口門寬八丈臣因黃水盛長漸次內漾欽遵

睿訓將兩壩壩頭各接築一丈五尺止留口門寬五丈以期束清禦黃奈口門愈窄黃水愈高復將接築壩頭拆去仍留口門寬八丈以緩其勢查春初洪湖清

續行水金鑑卷五十九

淮水

二

水原高黃水二尺五寸今湖水未增黃水加長七尺餘寸測量黃河水面轉高於清水四尺三四寸外高內低致黃水復行倒漾勢必漾至五道引河以內臣相度形勢惟有將攔湖壩工照舊暫堵不使灌入洪湖俟黃退清旺卽行開放如上年九十月間阿桂在工察看黃水倒灌情形公同講求別無補救暫藉已灌之黃水浮送回空漕船本屬不得已之舉今重運正在北上值此黃水旺盛亦祇可仍前暫藉浮送溯查乾隆三十三年三十六年及四十三年亦俱如此後經黃水消落清水盛長暢出清口旋即復舊蓋每年桃汛長水沙性本輕且易消落今春連得透雨四

五月間淮水必然加長其時桃汛已過黃水定消湖水一旺清黃即可相抵奉

硃批覽奏卽遣阿桂前往汝等熟籌而行

南河成案

按是

時河督李奉翰將攔湖壩照舊復行堵閉具奏奉

上諭據李奉翰奏桃汛長發黃水高清水四尺餘寸又復倒漾入口將攔清壩仍舊堵築此事甚塵憂慮已遣阿桂前往會同籌辦詢據阿桂奏稱現在黃水倒漾恐浮沙漾入引河是以復將攔清壩堵住俟黃水長發再行啟放等語引黃濟運出於無奈下策淮揚一帶運河日久必致淤墊實屬不成事體但目前權宜之計不得不藉以浮送重運朕思毛城鋪王營減壩俱爲秋伏大

續行水金鑑卷五十九

淮水三

汛宣洩黃河盛長之用若將該二處閘壩啟放黃水自見消落清水卽可暢出於漕運或較有益是否可行此時若黃水已落清水暢出固可不必也著傳諭李奉翰先行詳晰覆勘具奏並著阿桂酌量情形據實奏聞尋覆奏稱清口一帶前因黃水盛漲倒漾進口誠恐浮沙漾入河內是以將攔清壩復堵嗣於四月初西南大風湧送清水暢注引河測量清水又高黃水一尺二寸復將太平引河開放俾清水暢出敵黃日來黃水長消無定清水仍由太平引河分流入運刷沙有力察看情形如西南風大則清強於黃若東北風大則黃強於清易於倒漾職是之故今蒙

指授機宜酌開毛城鋪王營減壩期瀉黃助清於漕運
有益查毛城鋪減水壩在徐州以上每遇伏秋大汛
宣洩黃河盛漲由洪濰二河達五湖匯歸洪澤出清
口歸海可以減黃助清此外如天然閘峯山四閘祥
符五瑞二閘並桃源境內高家灣之三堡均在黃河
南岸與洪湖毗連各閘壩以下引河遠近不一若減
洩黃水迤邐入湖水已澄清不致淤湖皆可助清其
王營減壩在黃河北岸僅能減黃不能助清此時清
水力弱未能會黃東注下游山安海防一帶河底恐
未能刷深若再分洩既不能得助清之益轉恐黃河
下游水緩沙停尾閘高仰是以未敢輕放敬繹

續行水金鑑卷五十九

淮水四

諭旨若黃水已落清水暢出固可不必啟放全河要領
已在

聖明洞鑒之中臣先行詳悉履勘察看黃水長落大小
將應行商辦處俟阿桂到時再行會籌妥酌辦理另

奏此因時移變亦不能執一者也

河渠紀聞

四月李奉翰等奏十六十七等日欽奉

上諭二道臣等正在會籌覆奏復接奉

上諭以廬鳳道王懿德到京引見面奏安徽鳳潁等屬
雨澤優渥現在祈晴該處爲淮河上游淮水更當旺盛
太平河迤西之裴家場等四引河攔湖壩工尙復堵閉
恐致高堰各工著重令臣等將該引河酌量於何時啟

壩現在洪湖水勢較前是否增長與高堰各工有無妨礙之處查明據實覆奏伏查洪湖尾間引河五道原以濟運抵黃水大全開宣洩水小酌量攔蓄本係隨時相機辦理自啟放太平引河後清水外出已足濟運因其力未旺是以迤西之裴家場等四道引河壩未即啟放原以留待湖水盛旺時開放分洩以爲敵黃之計今洪湖內高堰誌椿前經長至四尺九寸臣李奉翰已附摺奏聞嗣又加長二寸自係上游雨水加增所致但連日淮水尙未大發堰盱石工計高出水面一丈三尺餘寸即較向年五壩過水時亦尙少三尺四寸無虞風浪撞擊茲復籌酌目下湖水已蓄存五尺一寸向後若再加長至七尺以上力足抵黃刷沙即應將裴家場等四道引河次第啟放以資宣洩若所長尙在七尺以內五壩未至過水仍應遵照先奉

續行水金鑑卷五十九

淮水五

諭旨將裴家場四道引河暫行堵閉俾清水力旺一放不可遏抑於敵黃濟運兩有裨益兼可藉以攻沙刷深河底臣李奉翰惟有凜遵

訓諭隨時察看相機妥辦以期仰副

聖懷

南河成案

是月阿桂奏江省清口因三月望後桃汛黃河水長高於清水致復漾入臣阿桂奉

命前來與臣李奉翰會同籌辦四月初八日自京起程時值黃水漸次消落仍清高於黃臣李奉翰等於阿桂未抵江省時已將太平引河壩工開放俾清水外出濟運臣阿桂於二十日馳抵桃源次早渡黃由清黃交匯處所直至通湖五道引河各處詳勘目下高堰誌椿存長水五尺一寸清水由太平引河放出分爲兩股一股出清口會黃清水力弱未足抵禦一股流入淮揚運河流行頗疾本年重運糧船共三千六百六十二隻扣至月之二十三日已渡黃一千五百四十七隻按日核算五月內可全數渡竣不復阻滯但湖查四十八九等年高堰水誌三四月分止存水四尺以內前年冬底誌椿長水已消落無存上年五月以前湖水尙能外出濟運迨五月下旬黃河水長始形倒漾至七月河水異漲直灌入湖又值湖水過弱五道引河普律受淤清水涓滴不出今年三月高堰誌椿存水四尺六寸嗣陸續加長共存五尺一寸何以桃汛黃水甫長卽行漾入此時黃水已消而清水仍不足資禦臣阿桂悉心體察並與李奉翰及各道將等將上下游水誌逐一比較現在徐城水誌僅存五尺八寸迤下邳睢宿虹各汛存水亦不過八尺上下至桃源卽有九尺二寸老壩工竟有一丈五尺餘寸雖向來大河水勢下游深於上游而臨黃迎溜

處所埽前之水更深老壩工誌椿係在埽前然亦不應該處獨多至七尺餘寸推求其故緣上年七月黃水異漲倒灌入湖時臣李奉翰等慮及湖心淤墊兼之山海各工在在報險不得已將王營減壩及各處減壩啟放原爲救護隄工起見無如去年夏秋湖水竟未長發是以黃水陡落而清水無出老壩工適處王營減壩之下開放抽掣大河溜勢未免稍緩致河底稍墊河水旣高清水益低水爭高下遂致易於倒漾是以臣阿桂前在途次業將此時王營減壩未便啟放緣由具奏但欲治清口之病必先去老壩工以下河身之淤墊尤當掣低黃水使清水暢出以水攻沙不勞人力而自治日下清水尙未旺足不足以資衝刷現在太平引河儘敷浮送重運所有迤西之張福口等處四道引河應遵照

續行水金鑑卷五九

淮水七

諭旨暫行堵閉以蓄高清水其通湖引河雖於上年挖挑展寬尙當再加挑挖俟至淮水大長高堰誌椿存水七尺以上彼時再將王營減壩開放使河水掣低隨時將通湖五道引河盡行啟放庶清水全行出口通黃東注老壩工一帶河身可以大資滌刷前乾隆三十九年黃水倒灌時卽係如此辦理可以踵行

河南

成案

五月二十七日李奉翰奏清口自開放太平引河後

清水暢注力雖未足抵黃而流入淮揚運河現已衝
刷寬深重運足資浮送惟自風神廟至惠濟祠一帶
黃水內漾長落靡定糧船至此遇風平水長則渡黃
甚速風逆水落則渡黃較遲查洪澤湖水前經阿桂
會奏俟長至七尺以上再將通湖五道引河盡行開
放俾清水全力出口逼黃東注原爲大汛抵敵之計
臣隨時查看如黃水消落開放清水力足抵黃卽不
拘尺寸酌量開放浮送重運倘清水力不相抵仍當
藉黃水以資饋運至通湖五道引河經阿桂奏請展
寬以十丈爲度會總處展寬以二十丈爲度并將河
身一律挑深當卽派委裏河同知陳太初守備周永

及幹練汛員分段趕挑專委河庫道司馬駒就近催
辦自五月初八日興工以來已辦有六分工程南河成案
六月十四日李奉翰奏本日奉

上諭據李奉翰奏數日來清水尙不能抵出黃河而黃
水時長時消更兼風勢靡常幫船未能遄行上年十月
因回空幫船難行曾開迴龍溝浮送但彼時曾否續行
增長現在作何等辦情形據實迅速覆奏欽此伏查上
年開放迴龍溝借黃浮送回空漕船因值冬令清水
難期加長黃水亦在沙輕溜緩之候與運河尙無妨
礙然亦不得已權宜之計誠如

聖諭以黃濟運無異引賊入室今當伏汛清水可望加

增黃水正在盛長是以未敢復開迴龍溝致滋淤墊
茲蒙

聖明垂鑒臣益知遵守至太平河張福口兩道引河已
次第開放水勢雖暢奈黃河相頂清水未能直出抵
黃風神廟至惠濟祠一帶黃水蕩漾停淤適安徽撫
臣書麟來工臣會商籌辦每日添夫撈浚挽拽漕船
前進終非常策茲自初六日以來淮安清口一帶地
方大雨時行初八日至十二日霽雨如注遠近霑足
上游安徽河南二省得雨自必相同淮水定然長發
洪湖水現在逐日加長高堰誌椿已長至七尺三寸
淮揚運河水勢較前倍暢兩岸浮沙刷深江廣重運

續行水金鑑卷五九

淮水九

足資浮送緣通湖五道引河現已加倍挑深已開之
太平河張福口兩道引河宣洩頗暢但黃水日加增
長頂阻清水遂致出口少而入運多數日以來糧船
渡黃甚少臣再四籌維清水刻下已旺欲其暢出抵
黃刷沙必須先將黃水減掣覆查前經阿桂奏明清
水長至七尺以上應開引河之時黃水亦必加長卽
應將王營減壩同時開放減洩黃流庶清水可期暢
出今正當其時臣現將王營減壩開放使黃水由鹽
河減掣併遵現奉

諭旨再將裴家場張家莊天然等三道引河次第開放
既減黃水之勢復助清水之力清水自必乘勢暢出

刷沙重運即可進行

南河成案

是月二十八日李奉翰等奏奉

上諭前據李奉翰奏清口一帶大雨時行洪澤湖水逐日加長高堰誌椿已長至七尺三寸通湖五道引河已倍加展寬刷深已開之太平張福兩道引河宣洩頗暢等語是清水未嘗不逐漸增長乃本日毓奇奏到重運渡黃情形一摺內稱連日甘霖疊沛淮揚運河水勢深通惟河口仍屬黃強清弱淤沙梗阻會同李奉翰等督飭員弁提集人夫及各幫水手併力疏通隨挖隨行并將船上所有篷桅器具盡行起剝自初八日起至十七日止僅拉過台州前幫船十隻渡黃北上等語若以船

續行水金鑑卷五九

淮水十

計算是一日止渡一隻空船此外尚有二十七幫計船一二千隻如此挽渡伊於何底况此時清水既長仍不能暢出敵黃刷沙濟運推原其故究係上年借黃水以送回空朕卽以爲無異引賊入室浮沙淤墊河底漸高清水頂阻不能暢出其受病實由於此現已六月下旬重運未渡黃者尙多李奉翰等現將王營減壩開放洩黃引清以資浮送未知是否有濟且恐水分則流緩不能衝刷浮沙轉致河底愈覺淤高朕心甚爲焦慮此次富勒渾等已將次解送到浙阿桂於審辦完竣後卽速回程至清口一帶與李奉翰等詳悉講求爲之主持定見於事自更有益現在作何設法籌辦俾重運不致稽

遲之處著傳諭阿桂熟思審計據實奏聞至本年有閏七月爲期究寬李奉翰等惟宜同心協力設法催儻不必心存惶懼以致茫無主張並將上年此時已渡黃者若干幫未渡黃者若干幫計算日期比較遲早是否無誤抵通之處據實覆奏不可回護再從前陳世倌會奏設立混江龍爲疏浚浮沙之需海口雖無用處現在河口淤沙梗阻或倣照此法用小船往來帶犁爬沙令其活動以便隨水衝刷似亦疏通之一法著李奉翰酌籌辦理覆奏欽此查漕臣毓奇前奏河口水勢及重運渡黃情形就六月十八日以前王營減壩甫經啟拆五道引河次第開放水勢尙未暢順之時迨十八日後

仰賴

聖主洪福黃水漸消湖水日長每日長有四五六寸不等自十八日至二十五日共長水三尺二寸連前長至一丈五寸清水日旺河底日深重運日益暢利共過漕船一百一十六隻業經臣等節次奏聞茲二十六七兩日又連遇大雨洪湖復長水一尺三寸連前長至一丈一尺八寸清水出口更爲有力直抵彭家馬頭迤下會黃東注前此慮清水之弱今又慮清水之多臣李奉翰書麟在河口一帶查勘復將新建禦黃東西壩展寬三十餘丈其山盱五滾壩水高壩頂已有三尺三寸及二尺八寸不等壩頂封土俱經加

培高厚但湖心尙屬飽滿仍有加長之勢臣等商酌高寶邵伯諸湖兩年來天旱水小存水甚少洪湖分洩下注之水儘可容納現由五道引河暢出之水頗大清江一帶運河水已充裕與其日後湖水湧漲開放不及似不若乘此未盛之時先啟一壩使循序洩宣以免風浪又免下游驟湧隨委河營參將鄭永泰馳赴山盱將五壩內義字壩先行啟放以資減洩其清口內外淺滯之處荷蒙

皇上諭用混江龍最爲得力臣等於六月上中兩旬因清黃相抵是以卽用混江龍及杏葉爬鐵篋子等項器具拉浚爬撈亦屬有濟今清水旺盛暢流刷滌河身河底日見寬深臣等在東西壩內外逐段測量淺處亦深有一丈五六尺深處二丈八九尺至三丈一二尺不等水力日盛河底日深現在水勢溜急只須多用障錨划船帶領漕船卽可出口渡黃從此沙隨水去可期迅復舊觀仰慰

聖懷日內阿桂自浙回程經過履勘如尙有應行籌辦

自當會同悉心籌商料理

南河成案

是月李世傑等奏報洪湖驟長水一丈五寸拆展束清壩五十餘丈禦黃壩二十餘丈以暢其流按清江河口初以水勢陡耗力弱黃流倒灌水緩沙停隨挖隨淤糧船不能前進開張福口引河並將五道引

河酌量開放一二以暢其流嗣於六月十三四等日湖水陡長至八尺二寸至是又加長至一丈五寸先後具奏奉

上諭據李世傑等奏二十一二三等日大雨如注洪澤湖內雨後復長水一尺二寸連前長至一丈五寸水勢浩瀚山盱五壩封土現仍實力堅守其運口以外束清壩已展寬五十餘丈新建之禦黃東西兩壩共展寬二十餘丈俾清水暢達刷沙敵黃漕船剋日可以渡竣等語前因黃水盛漲清水弱小朕悉盈虛消長之理知清水必有旺盛之時曾諭令李奉翰等於高家堰一帶隄防工段先事熟籌慎之又慎今湖內現已陸續增長高堰

續行水金鑑卷五十九

淮水

三

誌椿長有丈餘果不出朕所料該督等更宜時刻留心應將禦黃東西壩再加展寬十餘丈俾清水暢流有力既可刷滌浮沙而又不致壅遏生患方爲妥善不可膠柱鼓瑟第拘泥束清之說也至山盱五壩雖應堅守但上年亢旱日久高寶諸湖俱經乾涸足資容納朕意若將智信二壩開放俾清水宣洩入湖豫備將來水少時濟運足資瀦蓄似更有益著傳諭該督等相度機宜酌量辦理不可固執亦不可遷就也再阿桂在浙諒必因河口水淺籌慮著將李奉翰等節次奏到清水長發各摺及現降諭旨抄寄閱看欽此遵卽加展禦黃壩熟籌辦理復於六月二十八日至七月初二日陸續加長

至一丈三尺餘寸奔流下注運河水亦驟湧復加展
禦黃壩五十餘丈開義智兩壩封土將辦理情形據
實具奏欽奉

諭旨謹守仁禮等壩將清口東西壩再行拆展俾清水
暢出刷滌泥沙其運河東岸之車邏等壩亦加土謹
守不可令其過水淹及下河民田

天語煌煌

軫念民瘼保護下河七邑百姓之生計至再至三有加

無已矣

河渠紀聞

乾隆五十二年六月初四日工部議得江南河道總督
李奉翰等疏稱太平張福口裴家場張家莊天然五

續行水金鑑卷五十九

淮水十四

道引河尾間上年因湖水過小築做攔湖大壩本年
因新建禦黃東西壩中間抽挑引渠之後當飭將張
福口大壩開放寬六尺使清水由新挑引渠至臨黃
壩根以備比較清黃水勢高低尺寸旋於水勢落平
後仍卽堵閉蓄清濟運嗣因重運漕船入境又飭將
張福口太平河二處攔湖大壩啟放濟運乃於三月
內黃水加長清水未發恐漾入五道引河復飭將攔
湖壩工照舊暫行堵閉不使漾入洪湖俟黃水退後
清水力旺卽行開放經臣先後奏蒙

聖鑒今據淮揚道師彥公詳稱前項工程共估用料物
夫工銀二千八百四十六兩二錢七分六釐造冊繪

圖詳請題估臣復核無異除冊圖送部查核外謹會同督臣李世傑安徽巡撫書麟合詞恭疏具題查裏河廳張福口太平河二處啟閉攔湖壩工據該督將估需工料夫土銀二千八百四十六兩二錢七分六釐造冊具題臣部查係奏明之工應准其辦理但查五道引河口原築攔湖大壩一道共長二百五十丈至張福口太平二道引河啟閉壩工自應照依河寬丈尺開報查張福口引河原挑口寬七丈八尺底寬三丈牽寬五丈四尺啟閉壩工何以開長三十六丈太平引河原挑口寬六丈六尺底寬三丈牽寬四丈八尺啟閉壩工何以開長二十四丈冊內並未分晰

續行水金鑑卷五十九

淮水 十五

聲明應於副冊內粘簽鈐印發還該督轉飭查照於報銷案內據實另冊具題核銷可也

南河成案

是月初五日

上諭軍機大臣等從前下河一帶年年被水田廬淹浸小民生計可憫高斌任總河時總以謹守五壩爲最要而未思及拆清口之束水壩是以有二閘之決裂也朕於壬午年南巡指授機宜立定水誌山盱五滾壩非遇盛漲之年不可啟放以保下河民廬田畝上年因五十年春夏亢旱日久高寶諸湖俱經乾涸是以令該總河等酌量情形或將智信二壩啟放俾清水宣洩入湖以備將來水小時濟運之用嗣因湖水盛漲各處隄工漫

溢經該總河等將五壩全行啟放洩水此係萬不得已之計本年江南各屬春夏之間雖雨水稠密河湖水勢俱有增長情形朕意應將清口東西壩口門再行拆展俾湖水東注暢達歸海其山盱五壩仍應謹守今據李奉翰奏豫啟一二壩使湖水循序下注由高竇諸湖入運歸江等語啟壩後若湖水果由高竇諸湖入運歸江上游自可免驟壅之患此雖一時權宜之計但萬一淹及下河民田其害甚大非所以仰體朕軫念民依之意著傳諭該督等此時應再將清口禦黃東清二壩大加拆展以資暢注山盱五壩封土究以不可輕易拆動爲是如果湖水盛漲宣洩不及實有不可不啟放一二壩

續行水金鑑卷五十九

淮水 十六

之勢該總河等臨時再行酌量情形奏聞辦理

純皇帝

聖訓

是月十四日李世傑李奉翰覆奏查山盱五壩分洩湖水與下河民田實有關係從前只知啟放五壩並未思及拆展清口全湖多爲旁洩運河東岸南關車邏等壩又復常開致下河州縣年年被淹自乾隆壬午年恭逢

聖駕南巡立定淇湖水誌如湖水盛漲大展清口使會黃東注歸海不令旁洩二十餘年以來下河民田豐收成效屢著實出

聖主睿謨廣運臣等欽遵恪守上年初因五十年被旱

高寶諸湖乾涸暫洩湖水分注繼因洪湖異漲各隄漫溢下河不保遂將山盱五壩全行啟放誠如

聖訓實爲萬不得已本年湖水加長逾誌臣李奉翰遵照限制先將東清禦黃二壩展拓因湖水有長無消復將兩壩全行拆除并委員住工會同廳營將壩身一律刨挖深通俾湖水全由清口暢出歸海其山盱五壩原令謹守勿開下游運河東岸之南關車邏及五里中壩昭關等壩封土更令倍加防護迨五月望後至今大雨連綿各處山泉暴發匯歸洪湖水長未已恐其驟壅不得已將五壩內之智字壩開放分減臣李世傑書麟到工察看湖水未定高堰誌椿漸長

至一丈二尺七寸湖心猶在飽滿由運口而入裏河水大勢不能容復將禮字壩開放核計兩壩過水無多下游高寶諸湖尙可容納現由邵伯以下入運歸江甚屬通暢其南關車邏五里昭關等壩封土未動并嚴飭廳營加謹保守不使分注下河此實一時權宜之計就目下情形而論五壩雖開兩壩於下河民田實無妨礙今蒙

聖明嚴切指訓臣等惟有將仁義信三壩加謹保守若湖水從此平定卽或再長不致盛漲亦斷不敢啟放務期下河民田免淹以仰副

聖主念切民依之至意

南河成案

是月二十五日奉

上諭軍機大臣等本日李世傑等奏洪湖因十五日西北風暴較大兼之大雨如注湖中浪如山湧信壩已被風浪掣動過水仁義二壩尙未刷通風息雨止後趕緊補築等語湖水驟漲下游高寶諸湖雖尙可容納但山盱五壩封土不可輕動今旣將智禮信三壩先後開放所有仁義二壩及車邏等壩務須敬慎保護倘或湖水盛漲宣洩不及實有不能不啟放之勢須隨時酌量相機啟放下游一帶民田廬舍所關甚大不可不豫爲籌及或先行曉諭該處民人早爲遷避並將秋禾及早收割以防淹浸該督等務實力妥辦以副朕軫念民依至

續行水金鑑卷五十九

淮水 六

意

皇帝聖訓 純

七月十一日李世傑奏洪湖湖水自豫省睢州下汎漫溢後由淮入湖日漸加長前經遵

旨將束清禦黃兩壩全行啟拆刨挖到底清水由清口暢出歸海甚速此時清口以下黃河全係清水雖兩岸舊壩時有刷塌均已鑲護平穩外河之湯董莊山安之莊家莊海防之馬起營迤下新工外鑲埽壩內澆裏戩俱已修做全完一律穩固惟湖水逐日增長前將山盱五壩內之智禮信三壩開放以來湖水未能消減連日據安徽省亳州蒙城鳳陽五湖盱眙等州縣稟報豫省漫水下注初尙安流近漸出槽漫灘濱

河邨莊被淹幸早準備居民已遷高處不致傷損並
准河東河臣蘭第錫撫臣畢沅札知豫省黃河因上
月上游節次長水又兼異常風雨睢州漫口日漸刷
寬大溜全注口門正河內僅存水一分是漫水來源
較大安省毫蒙一帶水勢難望驟消由淮河以達洪
湖亦必有增無減臣等察看湖心飽滿節經風暴堰
盱一帶石工已有掣卸段落現在派員會同各該廳
營分投搜護此後西風當令風浪堪虞仁義二壩實
有不得不開之勢臣等謹遵

聖訓不敢拘泥現卽相機開放以保堰盱工程至下游
高寶諸湖較上年盛長時水小二尺餘寸俱由三溝

閘以下金灣東灣西灣鳳凰壁虎及灣頭芒稻等處
滾壩閘座暢達歸江其運河東隄之南關車邏五里
中壩新壩並昭關等壩俱已加高培厚臣書麟於七
月初六日親查各壩封土現在高出水面者尙有三
尺餘寸是高寶湖河內多此洪湖兩壩分洩之水尙
可容納其下河各州縣早稻現在刈穫登場惟晚稻
雜糧尙未成熟臣等督率各該廳營並委員分段巡
防將南關車邏等壩加謹保護不輕開放諄飭下河
州縣再行遍諭農民俟晚稻雜糧成熟卽趕緊收割
其安徽鳳潁等屬臣李世傑書麟前委藩司陳步瀛
馳看情形量加撫卹俟該司勘報到日臣書麟卽親

赴各屬督同辦理決不使一夫失所以期仰副

皇上懷保如傷之至意

南河成案

十月十三日書麟李奉翰奏外河廳禦黃壩裏河廳束清壩每年啟閉機宜爲全河關鍵本年六月因淮水盛漲并豫省睢州漫水匯注洪湖當將束清禦黃二壩連兩頭壩基全行啟拆撈深俾暢洩入海迨八月下旬睢州漫口收窄來源日減湖水漸消臣等將束清禦黃壩督飭廳營早爲趕築俟口門收至三四十丈時再行相機辦理節經奏聞茲查禦黃壩已築二百餘丈現存口門寬四十餘丈束清壩已築八十餘丈現存口門寬三十丈臣李奉翰前往清口相度

續行水金鑑卷五十九

淮水 三十一

湖水高堰誌椿雖現存七尺六寸較往年充裕而冬春湖水多蓄一分明年抵黃濟運卽多受一分之益隨又督飭裏外兩廳再加僱築將束清壩留口門寬十二丈禦黃壩留口門寬二十丈以資收束

南河成案

十一月阿桂李世傑李奉翰奏查高堰山盱二廳工程會於乾隆四十五年改輒爲石間段興修該工已在保固限外嗣後惟五十一年擇要修補一次所修之工高堰止七十丈山盱一廳止二百九丈五尺此內現共塌卸四十三丈因保固未滿業經臣李奉翰等著落原辦之員賠修均已於請修冊內開除卽行派員分段承辦限於明春桃汛以前一律報竣俾資

抵禦

南河成案

乾隆五十三年七月書麟李奉翰奏洪澤湖前因水勢
接續加長將清口束清禦黃二壩先後拆展騰空湖
面而上游正陽關淮水雨後復發湖水每日加長勢
甚旺盛臣等屢蒙

聖訓不使湖水由五壩旁洩以衛下河民田今湖水盛
大清口束清壩一百一十五丈已全行拆去而禦黃
壩展寬一百六十丈之後尚有兩頭壩基九十丈未
經全拆隨督令廳營一併啟除刨挖到底俾湖水暢
達出口數日來湖水仍長無消高堰誌椿已長至一
丈二尺六寸湖水仍前飽滿不惟臨湖大隄風浪堪

續行水金鑑卷五十九

淮水三

虞卽由清口暢出之水會黃東注滔滔歸海勢甚湍
激下游外河山安海防各廳兩岸埽壩工程亦俱著
重臣等復加籌酌山盱五壩從前全放過水之年高
寶一帶致難承受若酌開一壩下游增水無多而洪
澤湖湧盛之勢實可稍減今年高郵寶應邵伯諸湖
存水較上年計小六七尺不等儘可容納臣等當此
萬不得已之時又不敢稍存粘滯之見現將智壩封
土啟放過水其餘四壩仍加培高厚委員住宿巡防
實力保守不敢輕議開放現在天氣晴爽湖水已有
消動之勢一切工程搶護平穩

南河成案

十月二十九日李奉翰題外河廳清口禦黃東西東

水壩工水大拆展以資宣洩水小收束以濟漕運每年酌看清黃水勢大小隨時相機拆築上年六七月湖水盛漲奏明將禦黃東西兩壩次第拆展共寬三百五十丈後因水消隨飭道廳相機接築兩壩共築成二百三十丈留口門二十丈以資收蓄濟運今據淮揚道成汝舟詳前項壩工共估夫工料物土方銀九萬九千六百七十七兩五錢詳請題估臣復核無

異謹合詞具題

南河成案

十一月二十八日蘭第錫奏外河廳禦黃壩裏河廳束清壩每年啟閉爲全河最要關鍵秋汛後水勢漸消臣督飭廳營早爲接築收束十月初旬禦黃壩做

續行水金鑑卷五十九

淮水三

成一百餘丈束清壩做成六十餘丈業經奏報嗣又察看水勢次第接築口門寬四五十丈時因回空漕船銜尾渡黃恐兩壩金門過於收窄水勢湍急難以挽曳過壩是以暫停至本月初間空運全數渡黃又督飭廳營僱辦茲於二十二日禦黃壩連前做成二百三十丈口門寬二十丈束清壩連前做成一百三丈口門寬十二丈洪湖內高堰誌椿存水五尺八寸較上年此時存水大小相等來年抵黃濟運盈縮合

宜

南河成案

乾隆五十四年二月二十六日李奉翰奏臣從清口前往堰盱履勘臨湖大隄石工一律鞏固其年遠舊工

間有面石脫落石縫歪斜處所乘此水勢未長卽令補砌不使糜費其隄頂眉土尾土風浪搏擊之處俱隨時修填完整至仁義禮智信五壩封土所加防風尤關緊要若鑲做不堅易於掀揭臣指示工員務令鑲修堅實以資抵禦洪澤湖水去冬臣將清口禦黃東清兩壩恪遵

聖明指授機宜早爲接築收束禦黃壩口門留寬十八丈東清壩口門留寬十二丈多蓄湖水以濟新漕高堰誌椿現存水三尺五寸較之上年盈縮合宜清水出口有力直抵彭家馬頭迤下會黃歸海情形暢順

南河成案

四月初六日蘭第錫奏臣赴高堰石工至盱眙縣蔣家壩逐細察看大隄計長一萬七千餘丈臨湖石工仰蒙

聖恩不惜帑金加高修砌現俱鞏固內有遠年舊工或面石脫落或石塊掣卸殘損先經河臣李奉翰勘明同督臣書麟飭令補砌臣按段查驗均係亟應修築之工嚴飭該廳趕修以禦風浪并飭營汛督率兵夫巡防其石後尾土遇有掀揭隨時填補至仁義等五壩例有封土防風查驗春修高寬如式臣令該管廳營加意修護非遇盛漲不得開放以保下河民田目下高堰誌椿存長水四尺四寸較每年大小最爲合

宜湖尾五道引河均極深通出口甚屬有力

南河成案

閏五月初九日蘭第錫題外河廳清口禦黃壩工每年酌看清黃水勢大小隨時拆築上年伏汛因湖水加長河臣李奉翰奏將禦黃東西兩壩拆展共寬二百五十丈嗣因水勢漸消隨飭道廳接築兩壩共築成二百三十二丈口門寬十八丈以資收蓄先後具奏抄摺咨部嗣據淮揚道成汝舟詳稱前項壩工共估料物夫工土方銀九萬九千二百九十六兩二錢詳請題估河臣李奉翰調任未經具題將估冊移交臣復委員查丈勘驗謹合詞具題

南河成案

十二月初七日蘭第錫奏南北運河及清口以下黃

續行水金鑑卷五十九

淮水

三

河河身今年大水後衝刷甚深流行甚速臣等將束清禦黃各收束如式復於高堰通湖五道引河匯總處添築攔湖壩二道以期儲蓄充盈今誌椿存水四尺六寸較上年此時所存底水尚屬充裕今得雪澤各處倍加灌輸明春濟運更可有盈無絀

南河成案

乾隆五十五年二月十三日蘭第錫題高堰山盱二廳臨湖石工奏請補修據淮揚道趙載元詳稱高堰廳應修石工二十二段長四十丈三尺估需料物匠工土方銀一千三百八十七兩三錢零山盱廳應修石工二十四段長七十七丈九尺估需料物匠工土方銀六千一百七十七兩九錢零細核無浮造冊繪圖

詳請題估臣復核無異謹合詞具題

南河成案

四月十五日蘭第錫題高堰山盱裏河三廳因上年湖水盛漲七八月內疊次風暴堰盱石工並裏河運口臨湖輒工時被風浪掣塌經臣督令道將廳營分投搜護得獲平穩並先後具奏抄摺咨部今據淮揚道趙載元詳高堰廳搜護高堰汛堰字第九號石工共用料物土方銀九十八兩三錢山盱廳搜護澗徐二汛盱字第二號等處石工共用料物土方銀一萬三千四百七兩二錢裏河廳搜護運口汛臨字第三號臨湖輒工共用料物土方銀四百二十五兩三錢各工程動用銀兩勘驗確核委無浮冒詳請題估臣

續行水金鑑卷五九

淮水
三五

復核無異謹合詞具題

南河成案

八月十七日

上諭軍機大臣等福崧奏查明靈璧宿州被水情形及籌辦撫卹疏消各事宜所辦俱好已於摺內詳悉批示矣至福崧奏稱濰河隄岸民堰漫缺之處地方官以爲民修之工迄今尙未堵築現今親往查出勒限知州姚繼祖等星夜賠修上緊補築所需工料不許攤派間閭所辦亦是濰河民堰漫缺寬至十餘丈及二十餘丈不等分溜下注勢尙湍急自當及早堵築完竣俾下注之水斷流堵塞則下游田畝即可早爲潤出以便趕種春麥此係緊要工程乃該知州等視爲民修隄堰並不上

緊築辦甚屬玩誤所有應需工料卽著該員等自行出資補修毋許攤派小民以示懲儆但濰河一處如此恐此外民修隄堰地方官從而效尤亦漫不經心不能及早堵塞所關非細孫士毅務須悉心履勘如有似此玩視之員亦卽罰賠速修不可稍爲姑息又據韓鏞蘭第錫奏往來蕭碭一帶目覩被水田畝俱已涸出惟毛城鋪滾壩因外灘王平莊臨黃民堰漫缺過水之處未能卽時斷流現在五壩內智字一壩卽行拆啟等語王平莊臨黃民堰漫缺之處尙未斷流該處雖係民修之工但現在被災之區民力不繼自應官爲經理俾得卽時施工補築以期堵截下流惟此處隄堰向係民修由來

已久若因此次官爲辦理卽援以爲例國家經費有常其端亦不可長所有補修隄堰各工事竣後仍將所用工料銀兩覈明數目分年帶徵完款但不可使官吏藉此浮冒開銷若該處民力實因被災之後不能稍有葢藏無力分年完繳屆期該督撫等卽行據實奏明候朕降旨加恩寬免又高堰誌椿連舊存長水已至一丈三尺束清禦黃兩壩早經全行拆除到底而洪湖水勢未消自不得不於五壩內酌開智字一壩以資減洩但高郵寶應等湖是否足資容納關係下游一帶民田不可稍存大意務須敬慎辦理若有淹及田畝卽予賑卹且旣開放智字一壩將湖水分洩高郵等湖務須導令歸

江不使稍有阻滯其南關車邏等壩亦須嚴飭工員加
謹防護毋使稍有疎虞以保下河民田此為最要

皇帝
聖訓

純

九月初十日蘭第錫題裏河高堰二廳洪湖尾閘上
年十二月將束清壩接築收束後復察看機宜河身
衝刷甚深流行甚速當經飭將張福口太平引河二
道各築柴壩一道以資收蓄今據淮揚道趙載元詳
築前項束水壩工二道內張福口引河兩壩共築長
四十六丈中留口門寬四丈太平引河兩壩共築長
二十九丈中留口門寬二丈據實確估共需料物土
方銀七千七百九十三兩七錢零細核無浮造冊繪

續行水金鑑卷五十九

淮水 三

圖詳請題估臣復核無異謹合詞具題

南河
成案

十二月蘭第錫題裏河廳頭壩外束清壩工乃重門
收束兜攔湖水利漕濟運實為最要機宜本年伏汛
內湖水盛漲隨經奏明飭道將廳營將束清壩次第
拆展口門共寬一百一十五丈至秋汛後湖水漸消
隨飭道廳相機接築兩壩共築長一百三丈留口門
寬十二丈以資收蓄今據淮揚道谷廷珍詳接築前
項壩工共估需料物夫工土方銀四萬八千七百九
十七兩二錢零並無浮冒造冊繪圖詳請題估臣復

核無異謹合詞恭疏具題

南河
成案

乾隆五十七年六月書麟蘭第錫奏洪澤湖水因上游

大雨時行五月以後逐日增長一二三四寸不等截至六月二十日高堰誌椿共存水九尺五寸山盱廳屬周橋地方舊石工因初八十七等日西北風暴掣卸兩段高堰廳屬九堡舊石工亦掣卸一段臣等當飭該廳營樓護穩固應俟秋汛後再行補還

南河成案續編

乾隆五十八年十二月蘭第錫奏河口束清禦黃兩壩先於十月內卽經接築完竣臣復親加量驗禦黃壩共築長二百三十二丈留口門寬十八丈束清壩除壩基外計築長九十二丈留口門寬十二丈其臨湖引河內各壩亦俱築做如式層層收束洪澤湖高堰誌椿現存水四尺五寸較往年有盈無絀足資敵黃

續行水金鑑卷五十九

淮水

三

濟運之用

南河成案續編

乾隆五十九年七月二十九日書麟蘭第錫奏臣等於七月十三日接據淮揚道谷廷珍稟堰盱石工因六月二十九三十兩日風暴多有潑損甫將石後土隄樓護又於七月初七日亥時起至初九日戌時止兩晝夜異常風暴堰盱臨湖石工風浪掣卸更多其裏河外河揚河輒石等工亦有掣卸臣等趕抵河口及堰盱一帶會同查勘高堰廳屬掣卸石工六十八段長一千四十六丈零山盱廳屬掣卸石工五十九段長八百七十三丈零有將面石掀揭石工掣去數層根脚未動者有石工全行掣卸並石後土隄塌去五

六丈僅存後身隄頂寬二三丈者有浪過隄頂隄坡後身亦被淋塌僅存隄身一綫者詢之官弁兵民人等僉稱初七日晚間先起東北大風頂邊湖水湧注西南迨至初八日寅刻陡轉西風猛烈更甚全湖之水復湧注東北至高堰及運口誌椿陡長四五尺湖內浪高二三丈潑過隄頂是以石工旣被掣卸隄頂廟宇兵堡房屋亦多淋塌風暴旣大且爲時稍久實近年未有幸石工後土隄堅凝未致掣通過水所有山旰五壩雖被浪掀衝塌該廳營委員竭力搶護得保無虞臣等查看之餘悚惕莫名查現在高堰誌椿湖水存一丈一尺九寸秋汛風信靡常亟須搜護該

道將廳營等雖已分投搶辦但工段過多臣等又添派幹員並飭山清兩縣多撥大船運料臣等駐工漏夜督催現已搜護堅實至裏河廳運口臨湖石工掣卸六十一丈四尺外河廳吳城輒工並惠濟祠一帶臨湖輒石工掣卸七百四十五丈及掀掣海漫腰洞淋刷土隄亦俱分投督飭搜護現督道廳逐細確查分別舊工新修俟霜降後另估具奏辦理

南河成案

八月初十日奉

上諭據蘭第錫等奏高堰山旰地方於七月初七等日晝夜風暴臨湖石工多有掣卸湖水潑過隄頂廟宇兵堡房屋亦多淋塌幸石工後土隄堅固未致掣通過水

所有山盱五壩護隄雖被掀揭該廳營委員等竭力搶護得以保護無虞覽奏以手加額本年夏間雨水較多直隸山東河南等省均有被水地方今高堰清口一帶幸得保護無虞此皆仰賴

神明默佑化險爲平特發去藏香五十枝交蘭第錫等於

禹王廟

關帝廟

天仙廟

湖神各廟敬謹祀謝至該河督等前因防護伏汛工程穩固業經降旨俟奏報秋汛安瀾一併交部議敘今據

續行水金鑑卷五十九

淮水三

奏此次高堰山盱等處工程情形係屬湖水湧注該河督等分投督飭搶護平穩甚爲出力可嘉蘭第錫著交部從優議敘其在工出力之文武員弁亦著該河督等

查明一併咨部議敘

南河成案

九月蘇凌阿蘭第錫奏會看山盱滾壩及臨湖輒石各工掣卸搜護處所查自白露後湖水已漸消動高堰誌椿現存水一丈二尺四寸所有七月掣卸石工搜護各段以次查勘簽釘排椿鑲築護埽尙俱如式間有因風汕掣處工次儲料充裕該廳營等隨時修護至風掣石工欽奉

諭旨令卽勘估興辦此時湖水尙大石隄半在水底所

塌之工究係若干層數無從確核必俟霜降水消在塌卸處所圍築排椿越壩戽乾塘水露出石工根脚再行按層估計庶工料得歸核實惟所需石料甄灰等項採購程途較遠自當先行發銀購辦此次堰盱兩廳計塌卸之工長一千九百餘丈加以裏河外河揚河等廳掣損應修之工需用銀兩較多河庫歲修錢糧不敷支放請照乾隆五十二年補修甄石工程例仰懇

聖恩在淮揚兩關庫就近撥用如蒙

允准臣等酌定豫辦料物銀數先為撥給承辦人員趕緊購運仍俟秋深水落後築壩戽水吊撈石塊按實

續行水金鑑卷五九

淮水三

在塌卸層數丈尺確核估計需銀細數另行具奏並分案造冊送部查核再此次補修石工工程較大河工人員不敷調派臣等酌商擬委附近洪湖各州縣印官分段承辦以期呼應較靈工程迅速臣等仍督同淮揚道駐工查催務令石料寬長堅厚灰筋明亮膠粘全數貯工由臣等驗明再行興工剋期如式完竣不任工員稍有草率冒混以仰副我

皇上保衛民生之至意

南河成案 今按此摺部議照准

十一月初四日

上諭內閣蘭第錫奏高家堰一帶本年風損石工段落較多委員勘估而石工下數層皆在水中是否根脚整

齊抑或間有蟄裂未能確切估計現飭將應築越壩卽於此時先行圈築趕戽底水俾石工根脚顯露以便驗明確估等語此非深知河工之言輒石各工體質沉重如果根脚損壞則上面輒石必有閃裂陷下不平或致傾倒之處何待根脚顯露始能查驗若如蘭第錫所奏先行圈築越壩戽水高堰石工數十里皆築壩乎必無是理若築壩至底根脚並無蟄裂則此項築壩戽水之費豈非虛擲况湖水浩瀚非一二尺淺水可以車戽者彼水中築壩又從何處安椿立脚施工此不過河員因無可開銷故恣惠興工以爲冒銷地步或南北情形又有不同著派慶桂韓鏞前往會同督臣蘇凌阿確切履

續行水金鑑卷五九

淮水 三

勘繪圖貼說據實速奏若果應修卽時興工以歸核實

而杜冒濫

純
皇帝聖訓

是月二十四日慶桂韓鏞蘇凌阿奏臣等奉

命會同履勘堰盱兩廳本年風損石工自高堰武家墩起至山盱蔣家壩止共計石工長一萬七千三百二十四丈高十層及十六七層不等每石一層計一尺二寸今歲湖水異漲風浪間段掣卸共塌損一百二十七段其間相距有一二十丈者有四五里至十餘里者塌甚之處隄頂現存二三文不等詢之居民及防工人等僉稱實數十年來未有幸西北風暴止息得以乘時用埽搜護臣等察看誌椿存水七尺較上年

十一月分水大一尺四寸較臣蘇凌阿等委淮揚道等勘估時已消六尺有餘所塌石工根脚俱露今查應行加高者共五十二段塌卸倒底者共七十五段其應加應拆各工形蹟顯然無需厚水打壩查驗河臣蘭第錫所奏委員勘估時水勢尙大估計恐有不實因將先行築壩再爲確估具奏不思築壩厚水原爲做工而設非因估工起見誠如

聖諭如果根脚損壞則上面輒石必有閃裂傾陷何待根脚顯露始能查驗若如蘭第錫所奏則此項築壩之費豈非虛擲在工文武員弁僉稱凡臨湖拆修到底石工自應先築越壩厚水但係春融方可動手未

便太早等語河臣蘭第錫亦稱前奏實不明晰惶悚難名臣等細勘風損各工屢經委員估計高寬丈尺及工料銀十八萬二千八百餘兩按冊確核尙無浮捏內除年遠保固限外者應令動帑興修其在保固限內者計工四十八丈責令賠修再查

禹王廟前侯二門兩處石堰挺入湖心甚屬緊要臣蘇凌阿前會商河臣蘭第錫委令淮揚淮徐二道籌辦嗣據稟請於隄後擬築越堰以作重門保障估需銀二萬餘兩臣蘇凌阿奏明俟揭曉後會同河臣履勘再奏今復與臣慶桂韓鑠暨河臣蘭第錫會勘該道康基田等原估越堰共長五百一十丈今相度情形

尙可收小實應築長三百五十丈較原估減去一百六十丈足資防禦計減去銀五千二百二十餘兩實估需銀一萬四千七百九十餘兩以歸節省如蒙俞允卽令及時興工督河二臣現在催令打撈塌卸石塊趕運各料臣蘇凌阿蘭第錫卽照冊親驗俟春融勒限開工至河臣蘭第錫前奏並不將該工場卸打壩係間段情形分別聲敘致上煩宵旰咎有應得應請

旨交部議處以爲陳奏不明者戒

南河成案

乾隆六十年二月初八日蘇凌阿蘭第錫奏堰旰等廳應修風損臨湖石工前經

續行水金鑑卷五十九

淮水

欽差尙書臣慶桂侍郎臣韓鏞會同臣蘇凌阿等逐細勘估奏明飭辦經臣蘇凌阿蘭第錫遵照撥用淮安揚州兩關庫銀兩酌派河工地方丞倅州縣人員先行購料勒限運工俟春融興辦節次奏明自上年十一月月中旬臣等嚴催工員購運木植輒石各料卽據報源源開運嗣因時屆互寒河口一帶船行阻凍而揚州江口迤南購辦太湖石灰等項仍可次第僱運臣蘭第錫上下提催不任延緩茲正月下旬以來春融冰泮所運各料已接續到工臣率同淮揚道逐一查驗均照估如式現在湖水有消無長石工根脚益復顯露亟宜乘此春初水弱將應行修砌到底

之工照例趕築越壩攔住水勢及時清底創槽簽釘
椿木立定脚根然後逐層修砌以期堅實現飭承辦
各員於二月初十日普律開工臣蘭第錫卽親駐高
堰工次周巡查看每砌一層驗明甃石尺寸務令豐
厚灰漿尤期飽滿儻有絲毫偷減工料立卽嚴懲押
令翻築不任稍有草率

南河
成案

四月十五日蘇凌阿蘭第錫奏高堰山盱等廳修砌
石工分數并湖河水勢情形節經臣等奏報自上月
初旬以來仰賴

聖主洪庥天時晴霽土石各工均得乘時儻辦臣等親
赴各工催查并嚴立勸懲加之鼓勵工次料物旣已
應手人夫又復踴躍自二十日後次第報竣所有堰
盱兩廳屬補修石工一百二十七段同應築石後尾
土應補大隄後坡殘缺及侯二門

禹王廟前兩處圈築越堰等工於二十八日普律修築
完竣其揚河裏河外河等三廳補修臨湖甃石各工
委員分投督催屢次親赴查驗一律認真修砌亦俱
報全竣臣蘇凌阿現赴安徽寧國一帶查閱營伍並
會辦江蘇省秋錄事竣卽由彼赴工會同臣蘭第錫
再行挨工驗收至洪湖水勢自桃汛後並無長落高
堰誌椿仍存水三尺四寸由清口暢出黃河自桃汛
後水勢旋長旋消隄埽工程一律平穩

南河
成案卷終